

東
華
續
錄

東華續錄

咸豐七十五

臣王先謙敬編

臣陶濬宣恭校

九月庚辰諭內閣譚廷襄奏請藉團助賑一摺直隸大順廣等屬被水被旱前經諭令該署督妥爲安撫茲據奏稱業經籌動倉穀酌撥銀錢先行散放並稱辦賑之處多係辦團之處如寓賑於團就各處地方勸諭紳商捐輸銀米卽挑選壯丁巡防盜賊由董事經理按期散放可裕民食而靖地方等語著照所請所有捐辦紳商准其照直隸捐米章程給獎並准將前次部頒空名執照發給卽責成清河道董醇總司其事所有已捐銀錢一併提充賑款以今年冬三月爲度俟年底再行察看情形辦理毋得假手吏胥致滋擾累用副朕軫念民艱至意○諭前因樂斌奏安徽軍營咨調

補額兵丁請由本地募補一摺當交兵部議奏茲據奏稱軍營空
缺兵丁就地招充流弊多端難期得力並請飭嚴革積弊等語所
有安徽省咨調陝甘補額兵丁仍著樂斌照數派往嗣後軍營調
取各省兵丁如有空缺查明係何營分隨時知照該省於原營照
數挑補俟積有一二百名之數再由該軍營大臣奏請調派一面
將原調兵數若干應補空額若干咨照原省選派俟奉旨後卽行
飭令啟程至各省調撥官兵該管大臣務當認真挑選擇其年力
富強技精膽壯者始令前往軍營到營後再由該軍營大臣校閱
如查有老弱退怯者據實參奏其在營官兵除實係受傷患病准
其撤回醫治外儻有捏病及潛逃等事卽將該兵丁按律懲辦並
將該管官從重懲處該管官於本營逃兵匿不舉報者一併治罪
庶徵調不至頻仍而紀律嚴明兵皆得力矣將此通諭各路統兵

大臣將軍督撫提鎮等務各實力整頓以飭戎行毋負朕諄諄告
誠之意○駱秉章奏王鑫經臣調赴江西剿賊疊獲全勝駐軍崇
仁縣之鳳岡墟以得暑過征斗患瘡痢而軍士數月苦戰屍氣薰
蒸疾多不起其畱駐永豐縣城者卽選同知張運蘭督之七月十
四日探報吉安府城僞檢點傅忠信率賊萬餘至吉水縣城遣先
鋒賊僞將軍何姓率賊二三千將窺永豐縣張運蘭會同代理永
豐縣知縣章激等督勇迎剿斬擒二百餘名十六日傅逆由烏江
來撲張運蘭等復於城外野甕橋敗之斬擒一千二百餘名王鑫
以賊勢尙張派都司銜守備朱惟堂赴永豐助剿適臣所調同知
王勳訓導胡兼善帶勇繼至二十五日探報傅逆屯踞坪山王勳
令黃萬友朱惟堂由小路先鈔賊後而自率親勇嚴陣待之賊眾
排隊出抗官軍屹立不動相持間奇兵左右衝出斬賊六七百追

至雙源鋪烏江等處共斃賊千餘是日王鑫在鳳岡墟接署知縣
靳丹書稟報知賊擾近公坡墟料其將竄樂安而靳丹書所部太
單時已病莫能興力疾趨援二十六日抵浯漳探報二十五日靳
丹書已擊賊陣亡賊聞王鑫大隊掩至仍由公坡退竄崇仁縣境
王鑫移師入樂安縣城而瘡痍未減肝氣復動漸臻危篤竟於八
月初四日病故臣當飭同知張運蘭知縣王開化督其全軍分起
管帶並札令該道之兄王勳暫攝理全軍事務俟道路稍通護喪
歸楚臣維已故按察使銜候補道王鑫本湘鄉縣文生自咸豐二
年賊犯長沙卽在籍辦理團練與其師已故浙江甯紹台道羅澤
南以忠義激其鄉人講求束伍選士之法湘勇軍律之精實基於
此自札委帶勇以來剿除衡永郴桂各屬土匪捍禦兩粵會匪援
剿江鄂賊匪身經數百戰前後殺賊不下十餘萬克復城池二十

餘而所將之勇丁少僅數百多亦不過數千紀律嚴明所向有功
所著練勇芻言陣法新編練勇臆說尺一偶存各書皆可見諸行
事該道自蒙 天恩由諸生洊擢今職刻思圖效涓埃忠愛之忱
矢諸寤寐其父王宗麓常加訓勉屬無以親老爲念該員日在行
間亦未敢乞假歸省該員年甫三十有三方謂報國養親爲日正
長不料以勞瘁悲憤遽殞其生也合無仰懇 天恩逾格將該員
晉贈布政使銜照三品例從優議卹並特予諡法以獎賢勞湖南
江西建立專祠以彰戰蹟並請賞給該員父母二品封典以爲教
忠者勸 上諭按察使銜候補道王鑫由湖南生員帶勇剿除衡
永郴桂各屬土匪兩粵會匪並越境進剿湖北江西逆匪紀律嚴
明身經數百戰前後殺賊十餘萬克復城池二十餘處厥功甚偉
茲以勞疾歿於軍中深堪憫惻著加恩晉贈布政使銜卽照二品

例從優議卹並准其子諡仍於湖南江西地方建立專祠該故員
父母賞給二品封典以獎勲勤而褒忠義尋予祭葬諡壯武○駱
秉章奏王鑫一軍屢次大捷業經江西撫臣耆齡奏請保獎自應
聽候覈明辦理惟查卽選同知張運蘭同知銜王開化兩員在王
鑫軍中最久自援勦江西以來奮勇當先屢獲大勝本係應保之
員茲旣委帶該道舊部職分較小難期鎮壓應請旨先將卽選同
知張運蘭以知府卽選並賞加道銜同知銜王開化以知府卽選
出自 天恩其餘出力文武各員仍由江西撫臣耆齡保 上諭卽
選同知張運蘭同知銜王開化隨同王鑫援勦江西甚屬得力張
運蘭著以知府卽選並賞加道銜王開化著以知府卽選所有王
鑫原帶各勇卽著該二員分帶進勦其餘在事出力員弁兵勇著
耆齡覈明彙案保奏○諭軍機大臣等王茂蔭奏請飭外省廣鑄

制錢暫濟民急等語據稱江浙銀價向來每兩換至制錢二千有零自英國人在上海收買制錢錢卽湧貴以銀易錢之數漸減至半見在每兩僅易制錢一千一百餘文兵民交困而洋人竟據爲利藪因請飭於江浙兩省加鑪加卯廣鑄制錢以濟目前之急該侍郎所奏自係爲銀賤錢貴變通調劑起見著該督撫等各就地方情形酌量覈辦至洋人收買銅錢應如何杜漸防微設法阻止之處並著何桂清趙德轍晏端書悉心籌議具奏王茂蔭原奏著鈔給閱看將此通諭知之○扎拉芬奏奏俄羅斯夷官帶領夷圍人等啟程回國並不提及賠償之事已由該將軍派員款待護送出卡○辛巳諭軍機大臣等有人奏廣東客匪肆劫請飭查辦一摺據稱廣東肇慶府屬向有外來客民雜處山谷在恩平開平新甯鶴山新興高明六縣者爲尤眾咸豐四年土匪滋事該匪等藉

團練爲名糾眾數萬焚毀村落百數十里內人煙爲之一空地方
官止報土客械鬪容隱不辦恐將來釀成大患等語匪徒假團練
爲名聚眾至萬樹立旗幟擾害閭閻必得及早查拏庶可散其黨
與據奏情形恐不能以理論著葉名琛柏貴派委明幹大員督同
該管地方官將爲首各匪查拏治罪儻敢恃眾拒捕卽著帶兵勦
辦殲擒首夥各犯解散脅從毋使屯聚以靖地方而弭後患原摺
著鈔給閱看將此由五百里諭令知之○壬午諭內閣御史何兆
瀛奏捐納司員請照月選官之例由該堂官分別考其文理等語
各部院司員向例於三年報滿後由該堂官分別咨畱近來捐納
司員人數較多能否主臬辦事自應豫爲察看著各部院堂官於
該司員等奏畱之先驗其文理如果能辦臬案卽與正途人員一
體派差其或未能主臬而心地明白行走勤慎者派當雜項差使

以資練習○諭軍機大臣等勝保奏軍務稍鬆循例奏請陞見等語覽奏殊堪詫異前因英桂分兵馳赴河南是以命勝保專辦三省督勦事務又因勝保患病賞假一月命袁甲三馳赴正陽幫辦原因英桂離營之後勦捻重任係勝保專責見在正陽雖已克復而李兆受等股匪未殄卽張落刑韓狼仔等是否殲斃亦尙無確據捻匪並未肅清正宜偵探賊蹤節節按勦何得舍此重任遽請陞見且不待批回竟欲迎摺北上實屬不知輕重自用兵以來軍營大員升遷者甚多不獨統帥之員不克進京卽在營提鎮亦從無因升調而卽來陞見之事勝保豈毫無見聞若云有要事敷陳何妨登諸奏牘如果能合機宜朕亦必加採擇設或迂疏窒礙豈能因面奏而遂見施行朕畀勝保以督兵重任何又慮進退隨人臨事掣肘勝保著傳旨申飭所請迎摺北上之處著不准行該副

都統接奉此旨卽著折回正陽與袁甲三會商勦擒事宜督率諸軍安良鋤暴俟擒匪肅清應否移師南下候旨遵行毋得輕率冒昧有負朕恩將此由六百里諭令知之○諭前因安徽布政使恩錫奏皖餉支絀請飭部另撥整餉十萬兩赴皖當令戶部迅速籌撥茲據該部奏稱山陝等省本有協濟安徽之餉餘省並無款項可撥惟江蘇上海關稅每月得項較多必能均勻接濟請飭提撥等語見在皖省攻剿喫緊餉需支絀各省零星款項陸續解到分給兵糧難資周徧自係實在情形著何桂清等查照該部所議於上海各項捐款內提銀十萬兩就近迅速解赴安徽軍營以濟要需毋稍遲誤將此由五百里諭令知之○勝保奏臣前以鳳臺縣屬苗家寨生員苗沛霖借團練爲名到處均糧附近居民無不言其心懷叵測臣因其逆迹未彰不能不暫示羈縻當飭鳳臺縣知

縣李霖持

臣

手諭前往開導並因捻逆李兆受在迎河集一帶滋

擾卽令就近酌帶練勇前往迎擊以觀其是否聽命卽可決其從

違嗣李霖於八月二十三日來營面稟親赴苗家寨面見苗沛霖

曉以大義當交閱

臣

所給手諭據該生面稱本擬赴營謁見大帥

但因團眾過多無人統束一時難以遠離容後再行請示令具稟

呈覆等語

臣

查閱苗沛霖原稟尙無悖詞是否陽奉陰違不敢深

信但此時若遽脅之以威轉恐阻其歸正之路是以

臣

復開誠示

諭並諭以正陽餘賊儻乘流下竄令其帶勇截擊萬不准滋擾善

良貽害閭閻俟該生稟覆到日再當酌奪辦理得旨該生所稟雖

無逆詞然其以難於約束爲辭飾其旁觀之計正當示之不疑激

其義奮令自出以明心迹潛消反側斯爲計之上也○癸未諭軍

機大臣等張芾奏帶兵將弁遇賊退縮等語據稱崇覺寺爲徽甯

門戶二月間副將蕭知音督帶兵勇駐守適賊犯霧露嶺帶勇官
劉福林先逃該副將遽退往章村拋棄軍械致石埭縣城被陷鄧
紹良不行參劾猶謂蕭知音之退不爲無見旋在孝思嶺挫敗反
捏報殺賊復由章村退往涇縣嗣因周天受克復石埭經鄧紹良
派副將蔣錫光移紮崇覺寺該副將以不可守爲詞其心存畏葸
有意阻撓已可概見五月間周天受以大通有賊窺伺請飭蔣錫
光回涇畱守備馬雲龍堵剿馬雲龍亦聞警潰逃至七月間賊擾
萬祹嶺守備吳正熙兵敗總兵秦如虎不往接應退回涇城致令
該逆入嶺大掠以上各情張芾近在徽州見聞確切何以鄧紹良
未聞咨報懲辦恐該提督駐軍較遠誤信蕭知音等詳報之詞致
受欺蒙抑或因該總兵副將等皆其派往心存徇庇當此賊氛未
息豈可博寬厚之名致失律將弁毫無儆畏著何桂清按照所奏

情節據實查參毋稍姑容原奏片鈔給閱看將此由五百里諭令知之○諭本日據張芾奏請嚴懲債軍之將一摺據稱晏端書議由衢州撥兵扼守婺源總兵饒廷選委遊擊楊國正相度地勢謂中雲不可紮營宜守婺城張芾與江長貴力爭晏端書卒從楊國正之議饒廷選旋將該遊擊調回而派知府畢大鈺遊擊楊金榜帶兵分紮城外竟似豫爲退步迨賊偪婺城楊金榜等棄營而走以致縣城失陷見在屢催楊國正進兵會剿乃月餘之久始到德興縣屬新建鎮駐紮帶兵三千數百名尙欲稟請添兵觀望遷延不知是何肺腑請旨嚴飭查辦等語楊國正曾經何桂清奏賞勇號並據晏端書奏稱該員久歷戎行胸有韜略令其統帶在防官兵而債事若此楊金榜於七月中棄營逃走而晏端書稱其潰圍而出身受重傷情節亦迥不相符張芾近在徽州見聞較確該撫

遠在浙省恐該員等捏詞稟報受其蒙蔽著晏端書按照所奏確切查明如婺源失守實係楊國正貽誤事機今復擁兵不進卽將該遊擊撤回嚴參懲辦並另派得力之員前往管帶兵勇不得以保奏在前心存回護自干重咎楊金榜是否受傷抑係棄城逃避著一併查明參奏按律懲辦以伸軍法而儆效尤原摺著鈔給閱看將此由五百里諭令知之○丙戌 上幸靜明園○諭內閣法福禮奏官軍立解城圍並收復回城一摺官軍自克復英吉沙爾回城後探聞餘匪逃往喀什噶爾屬聚回城引水淹灌漢城八月初三日法福禮督兵前進行抵該城該匪聞風逃散官軍分路追剿卽將回城收復邊境一律肅清所有蒙古官兵著先行凱撤歸伍續調官兵卽行停止該回城被匪蹂躪應辦善後事宜卽著法福禮等妥籌辦理安輯回民使無失所○諭軍機大臣等法福禮

奏行抵喀城回黨潛遁請簡員籌辦善後各等語此次大兵甫抵喀城該匪卽聞風潛遁並未大受懲創難保其不去而復來且以數萬之眾一時紛散豈能全行出卡其附近地方山深林密之處必有餘匪潛蹤尤應實力搜捕法福禮係此次統兵大臣卽著暫駐該城會同裕瑞將善後各事宜妥爲籌辦並函商慶英固慶悉心參酌仍咨明扎拉芬泰會同具奏該處地方甫經肅清自應酌畱兵丁以資防守土爾扈特蒙古兵已有旨諭令先行撤回其伊犁等處官兵應酌畱若干著法福禮體察情形會同扎拉芬泰具奏其蒙古官兵歸伍時應如何酌加犒賞著傳知奎棟酌量辦理常清見無應辦之事著卽傳旨令其來京扎拉芬泰前奏應辦事宜各條所稱嚴查辦以重職守簡伯克以資撫綏平差徭以杜苛派三條均係善後要務著將原摺鈔給法福禮閱看卽著按照所

陳各條並應行參劾各員認真查辦法福禮請調葉爾羌伊什罕伯克邁瑪第敏著准其調往喀什噶爾令其安集回眾扎拉芬泰所稱喀什噶爾阿奇木伯克愛瑪特與該處人地不宜並著酌量揀調至此次回匪逃散多係聞風先竄卽沿途小有斬擒並未鏖戰法福禮保奏人員未免過多因念歲事迅速加恩允准此後接剿餘匪著毋庸再請獎勵以示限制將此由五百里各諭令知之○以英吉沙爾等處剿賊出力賞土爾扈特罕布彥烏拉哲依圖霍碩特貝子多爾濟納木扎勒雙眼花翎並賞給土爾扈特護盟長喀屯鄂斯庫吉爾噶勒 御書扁額○以葉爾羌等處剿賊出力賞伊犁領隊大臣錫拉那等巴圖魯名號參贊大臣法福禮花翎頭品頂帶烏嚕木齊提督業布冲額等花翎餘升敘有差○戊子諭內閣巴哈善伊綿阿奏連次剿賊情形並自請治罪一摺此

次回匪突入喀什噶爾占踞回城該大臣等未能先事豫防本屬
罪有應得惟念漢城防守尙嚴援兵到後回城亦卽克復巴哈善
伊綿阿均著從寬革職畱任○諭軍機大臣等此次回匪入卡滋
事圍撲喀城致回城失陷漢城被圍所有該城文武各員均有疏
防之咎其中有無畏蒞逃避禦侮不力之員尤當查明懲辦至英
吉沙爾回城失守除烏勒欣泰已疊降諭旨令扎拉芬泰等查參
此外文武員弁當起事之初何人貽誤亦應分別查明一體懲辦
慶英等係統轄大員亦有應得處分至其起釁根由前據慶英等
奏傳聞各異請俟蕩平後會查此時賊匪業已竄出卡外所有失
事情形不難確切查明法福禮見畱喀什噶爾籌辦善後事宜著
卽就近詳查據實具奏至賊匪由卡外竄入守卡各員何以漫無
覺察卡內回眾紛紛從賊該管伯克等何以不能約束輒行逃避

均著嚴參懲辦毋稍疏縱將此由五百里諭令知之○己丑諭內閣文祥奏參玩視軍務各員請分別懲辦等語雲南省城勦匪喫緊經文祥派令遊擊孫鉦抽帶賓川等處兵練赴援該員輒敢託病他往抗不回營經文祥摘頂示懲猶復沿途逗畱實屬膽玩著卽行正法以肅軍律革職畱營守備丁鶴齡隨同孫鉦赴省延不起程都司高天澤託故回城以致兵練無人統馭高天澤著卽革職與丁鶴齡一併交吳振械提省嚴行審訊按律定擬具奏儘先遊擊何有保捏稱患病不候批示輒卽離營不知去向實屬膽大妄爲著迅速查拏卽行正法都司韓寶守備李高於回匪撲營時未能悉力堵禦致有損失均著革職畱營以觀後效文祥自請嚴加議處之處著加恩改爲交部議處○諭軍機大臣等前因文祥奏軍務緊急請撥兵餉當經諭令吳振械於川省籌撥滇餉十萬

兩內酌量分撥本日復據文祥奏報兵單餉匱情形並稱見暫移營鎮南就糧請飭調陝甘兩省兵二千名並於鄰省撥餉十萬兩藉資進剿等語該營兵練餉銀欠至三月有餘自應速籌接濟著吳振械遵照前旨於川省撥滇餉銀十萬兩內酌量分撥派委委員迅速解往俾資散放陝甘兩省官兵撥赴各路軍營者過多勢難再調且兵多則餉益難繼文祥惟當就見有兵力督飭進剿如果必須添兵著俟吳振械到滇後酌度情形仍於四川各營內抽調至餉需不敷亦惟川省與滇較近藉可接濟著有鳳督同藩司祥奎豫爲籌畫以免臨時貽誤吳振械此時當已赴滇卽著嚴督官軍沿途掃蕩以期星速進行毋稍延誤將此由六百里各諭令知之○庚寅諭軍機大臣等福濟鄭魁士奏逆捻南竄並湖北賊匪回擾皖境一摺逆匪由六安竄入舒城並有捻匪從謝家河繞

至該縣桃鎮營後圍撲各營情形危急福濟等見派協領桂成等帶兵千餘前往救援如兵力尙單不敷攻勦鄭魁士自應親督大隊前往不得以待餉爲詞株守廬州前此克復舒城亦非易事乃自秦定三退後福濟等卽置桐城於不問曾無一旅之師赴桐攻擊舒城脅齒相依安能無事今旣復失卽責成福濟鄭魁士迅速克復然後由舒攻桐次第進勦豈得以分兵策應遂可塞責耶至廬州缺餉前因恩錫奏請飭撥整餉十萬兩業經諭令何桂清等照數撥給其山陝兩省月解皖餉亦據恆福等先後奏報委解啟程該撫等卽迅籌進勦克復舒城毋誤大局將此由六百里諭令知之○諭本日曾望顏奏接准英桂咨照知捻匪竄入南陽府城見籌商雒一帶調兵防堵一摺捻匪由泌陽舞陽竄陷南陽該府城池如何失守及見在籌辦情形想英桂業已奏報在途前據勝

保袁甲三奏飭令邱聯恩統原帶南陽鎮官兵八百名星馳回豫助剿於八月三十日啟程嗣聞南陽賊勢猖獗閩丕敏龍澤厚等連次挫敗勝保復將劉尙義張玉榮勇隊帶赴陳州擬卽酌撥相機策應見在邱聯恩一軍自當隨同英桂進剿角子山等處竄匪而南陽被陷距許州較遠必得另派一軍馳往援救是否可派劉尙義等所帶之勇前往南陽抑另有可派之兵著英桂卽與勝保函商辦理至勝保奏請陞見曾經降旨申飭寄諭卽令折回昨知其竟於初六日啟程由水陸行走恐前次寄諭未及奉到著於接奉此旨後迅速折回正陽與袁甲三會商攻剿機宜昨據奏派出參將寶沙布等共帶兵勇一千一百名前往河口集防堵見在李孟羣攻六安未下而竄匪踵至深恐兵單應否將寶沙布等所帶一軍移營前進與李孟羣會合攻剿之處並著勝保袁甲三迅速

籌辦毋誤事機將此由六百里各諭令知之○辛卯諭軍機大臣等本日據李孟羣奏匪眾圍攻蘇家埠營盤暫退河西請兵協助一摺據稱該匪每以大隊衝突我軍自應添調馬隊以資攻勦勝保軍營馬隊已無可撥惟湖北見在肅清兵力尙可分調該藩司奏稱與副都統巴揚阿共事最久所帶馬隊實爲得力請飭酌帶馬隊二百名步隊三百名前赴該營著官文都興阿胡林翼酌量抽撥卽派巴揚阿統帶前往幫同李孟羣進攻六安毋稍延緩至勝保克復正陽關後奏稱霍邱一帶空虛已派參將賽沙布等帶兵一千一百名駐紮河口集以爲李孟羣聲援此項官軍自應移營前進與李孟羣會合不應遠紮河口昨已諭令勝保袁甲三酌量調遣該藩司見在紮營獨山先就見有兵力妥爲布置一俟湖北馬隊到營或與勝保等所派之兵聲勢聯絡卽可相機進攻爲

克復六安之計本日奏保各員業經降旨獎勵所請執照已著該部照數頒給矣將此由六百里諭知官文都興阿胡林翼並傳諭李孟羣知之○裁撤甘肅嘉峪關外駱駝廠西雙井火燒溝防兵四百五十名改撥肅州及安西等營兵七百名分駐嘉峪關安西州玉門縣每月食口三次並於關外青頭山設獵戶二百名赤金營設獵戶一百名駐守所需口食銀五千四百兩除向領銀一千兩外由肅州等鎮營捐辦及甘省道府廳州縣養廉內攤捐支發○壬辰諭內閣前因端華等奏查出八旗步甲空缺一千五百餘名當交步軍統領衙門確查挑補茲據文彩等遵議具奏八旗步甲各有守衛之責豈容額缺久懸虛糜糧餉既據查明款額數目相符卽著照所議章程挑補足額至各甲喇充當墊道差使向無經費擅將步甲空缺錢糧抵補辦公雖非侵吞入己究屬私自那

用惟念事閱多年官非一任所有八旗協尉以至步軍校各員應得處分著從寬免議其兩翼翼尉等未能隨時查察咎有應得兩翼翼尉海福烏勒興阿右翼翼副翼尉官壽均著降爲四品頂帶左翼翼副翼尉富寬前次督緝不力處分尙未開復仍著降爲四品頂帶協尉兼委翼翼尉法保永泰均著降爲五品頂帶仍各降三級畱任以示懲儆所籌墊道公費並著照議辦理經此次查明挑補後務須兵歸實數餉不虛糜儻有雇替空額等弊卽著步軍統領左右翼翼總兵嚴參懲辦片片奏八旗地面堆撥多有損壞滲漏之處著准其將八九兩月空缺步甲錢糧責令該翼翼尉等勒限一月修葺整齊工竣覈實查驗毋得視爲具文○諭耆齡奏贛州府屬堵剿粵匪土匪獲勝全境肅清一摺江西贛州府屬各廳縣於咸豐六年春間被粵匪闖入勾結土匪分擾定南等廳縣經該地方文

武員弁督同紳民團練防勦將此股竄匪次第殲除全郡一律肅清所有在事出力官紳兵勇均屬著有微勞著該撫查明酌量保奏候朕施恩定南廳汛把總歐陽釗失守城池旋即隨同克復究屬防守不力著革職畱任以觀後效○予江西陣亡府經歷姚世恩祭葬世職○癸巳諭內閣會望顏奏查出官錢鋪委員等那移私販請旨革訊並究出藩司司徒照家人夥開錢鋪一摺陝西委員候補知縣郭廷椿丁憂未入流李洵見在甘肅禮縣知縣李應詔先後管理官錢局鋪事務竟敢那移官項與捐職王迎科及司徒照家人黃君任開設義源峴等錢鋪並將官錢運往各處售賣既據該撫派員查明亟應徹底根究郭廷椿李洵均著革職交會望顏嚴行審辦李應詔著一併革職卽著樂斌派員將該員解赴陝西歸案訊辦以儆官邪定案時將該藩司參辦○甲午諭軍機

大臣等前據法福禮奏回匪逃竄出卡邊境肅清當諭令法福禮暫畱喀什噶爾會同裕瑞籌辦善後事宜並令其面商慶英固慶咨明扎拉芬泰會同具奏茲據扎拉芬泰奏請畱常清會同裕瑞等辦理善後章程自係未經接奉前旨常清已有旨令其來京著毋庸畱於該處所有應辦一切事宜著仍遵前旨交法福禮會同裕瑞等妥爲籌辦至賊首倭里罕如果尙在內地自應早爲捕獲以絕根株今旣已逃出卡外毋庸深入窮追惟當嚴防邊卡不使再行竄入自可杜其窺伺其附近地方仍當搜捕餘匪毋令潛蹤另片奏喀城貿易安集延回子礙難令其仍住回城請仍照伊犁等處安頓哈薩克章程於距城二三里地方擇一曠地令其自行建房居住以便貿易等語自爲弭患未萌起見著法福禮等籌商妥辦將此各諭令知之○諭德勒克多爾濟等奏俄羅斯換班學

生停止來京迎接學生之筆帖式等官是否回京一摺並鈔呈該國咨覆庫倫及薩納特衙門咨理藩院文各一件該國學生見屆換班之年中國照例派員迎接今俄羅斯因不准普提雅廷進京之故停止學生來京並非中國拒絕止可聽之著德勒克多爾濟等體察夷情如果該學生並無來京消息自應將派出之筆帖式等官撤回不妨稍爲從緩亦不必與之辨論至普提雅廷於七月間到津經直隸藩司錢忻和等接收咨文據情轉奏卽經諭令該藩司等以禮相待並特派大臣赴黑龍江會同該使臣查勘烏特河分界事宜臨行復遣員相送普提雅廷收受回文欣喜而去並稱待回國告伊國主辦理是該使臣到津並無嫌隙此時分界事宜自應靜候會辦諒該使臣回國必有分曉此次薩納特文內請援照恰克圖例內第九條仍令普提雅廷入都等語理藩院事例

第九條內皆指使臣到邊界而言並無進京明文又是專言貿易並須將來辦何事先行報明此次普提雅廷並未說明何事又非到貿易處所與向例迥不相同恰克圖是否另有通商事例抑卽是理藩院條例著德勒克多爾濟等查明遇便附奏其薩納特衙門來文已由理藩院咨覆矣將此諭令知之○江蘇布政使文煜奏陳江南糧臺辦理棘手情形得旨汝旣身任其難務須不顧情面力求搏節所汰者劣員之浮冒所籌者闔營之兵餉若不改絃易轍深恐不能挽回○乙未兩江總督何桂清等奏楊能格才具優長惟自恃高明凡事不求實際見在江北糧臺較前漸有起色已諄屬楊能格率由舊章妥爲辦理得旨如此剴切訓飭該司儻仍華而不實則是一無用之人伊苟知愧奮尙可期其有成惟該司自勉自勵也可傳諭楊能格知之○以葉爾羌守城出力命三

品阿奇木伯克郡王阿克賴都在御前行走賞四品伊什罕伯克
貝勒邁瑪第斂雙眼花翎在乾清門行走○丙申諭內閣福興奏
克復東鄉縣城乘勝進攻金谿一摺江西東鄉縣城被匪占踞總
兵李定太督帶兵勇於八月二十八日冒雨進攻直抵城下於是
夜派撥兵勇四面圍攻並於平塘縱火杜賊竄往撫州之路逆眾
驚亂棄城而逃官軍奮力追剿當將縣城收復著福興卽著李定
太乘勝進剿金谿以孤撫州賊勢其新竄萬年等處股匪並著該
將軍督率兵勇迅籌堵剿毋任蔓延○丁酉諭軍機大臣等官文
等奏請添調吉林黑龍江馬隊並開單請調帶隊各員一摺本年
夏間通諭各路軍營將吉林黑龍江馬隊分別撤留原以該二處
調出之兵數較多本省未免空虛歷經景瀄奕山奏明無兵可調
是以各軍營有續請添調者皆未允准今官文等奏請添調雖爲

征勦得力起見而吉林黑龍江根本重地亦不可不籌兼顧本日
已諭知景瀄奕山酌量各調西丹二三百名實於無可調撥之中
勉爲抽派此項西丹恐亦須加訓練方能得力因思荊州駐防旗
兵當較綠營兵丁爲得力都興阿熟悉馬隊訓練自必有方若能
於駐防兵內挑選精壯令其隨同見有馬隊練習技藝亦可以成
勁旅著官文都興阿知會綿洵挑選訓練令其隨同征勦以省征
調之煩其單開各員已諭知奕山酌派數員帶領西丹前往該員
等既俱係得力之員本地亦資差委不能全數調出再前諭官文
等派巴揚阿帶馬隊二百名步隊三百名前赴六安幫同李孟羣
進攻此項馬隊爲數無多而李孟羣待援甚急諒已遵旨派往矣
將此由五百里各諭令知之○諭官文都興阿奏請續調吉林黑
龍江馬隊及西丹各數百人並開單請派帶隊各員等語吉林等

處馬隊調出過多餘應畱備本省操防未便再行調撥惟官文等所請挑選西丹三四百名赴楚係爲挑補馬隊缺額起見著景瀄奕山於該省西丹內各挑選二三百名派往湖北軍營至官文等所開協領察隆額等三十五員名據稱膽技兼優自係黑龍江等城得力之員亦未便全行派往著奕山於單開各員內酌撥數員卽令管帶西丹前赴湖北其吉林派出之西丹並著景瀄揀派得力將領管帶前往俾資攻勦原單著鈔給奕山閱看將此由五百里各諭令知之○己亥以江蘇糧價昂貴籌辦採買事宜免上海運米商船關稅○庚子諭軍機大臣等寄諭吉林將軍景瀄等奕山等奏普提雅廷由天津折回尙無消息其會勘烏特河地界一節據稱尙待回國請示伊主奕山自未便在彼久候惟界址未經議定而海蘭泡闊吞屯等處早有搭蓋房屋烏魯蘇木丹卡屬西

爾根奇海蘭通兩處左岸近復添設窩棚並有火輪船駛出黑河
口至薛爾古左岸停泊之事夷目央喪枯幅既故意推諉木哩斐
岳幅又擅敢駁回文書惟有嚴加防範斷其接濟著該將軍等妥
籌辦理本日已諭理藩院咨行薩納特衙門查詢普提雅廷於來
春何時到黑龍江以便奕山屆期馳往會勘地界且看其回文有
無別生枝節屆時再行相機酌辦將此諭令知之○諭德興阿等
奏江北兵餉罄盡請飭江海關將欠解銀兩迅速撥解等語揚營
汰兵減餉無可再省萬眾嗷嗷若專待三江營釐捐一款杯水車
薪無濟於事見在上海稅務日有起色何桂清等自能不分畛域
兼顧江北所有江海關欠解銀五萬五千兩著何桂清趙德轍卽
飭全數解交德興阿軍營以資接濟毋稍遲誤此後並著就近源
源協撥冀得士飽馬騰南北合力迅速成功將此由六百里諭令

知之○盛京將軍慶祺等奏遵旨查勘吉林與奉天河道東股既不能通西股上游又非產糧之區請仍照舊辦理得旨水運不如陸運之便自應仍舊貫也○辛丑 上幸萬壽山○諭軍機大臣等前據法福禮奏請將邁瑪第敏調署喀什噶爾三品阿奇木伯克當經降旨允准茲據慶英固慶奏葉爾羌被賊蹂躪之後一切善後事宜全賴邁瑪第敏相助爲理阿皮斯人尙明白是以委署喀什噶爾三品阿奇木伯克事務法福禮奏稱該伯克聲名平常請飭據實陳奏以便遵辦等語邁瑪第敏熟悉葉爾羌情形既據慶英等奏畱該處辦理善後事宜卽著毋庸調往喀什噶爾至阿皮斯如果聲名平常不但喀什噶爾難於勝任卽布古爾地方亦恐不能相當慶英到任未久於各城伯克恐未周知法福禮在南路多年著卽將阿皮斯劣蹟據實參奏其喀什噶爾三品阿奇木

伯克員缺著與慶英等商酌另行揀調委員以資整頓此次喀英兩城解圍該匪多係聞風先竄並未痛加剿洗據慶英等奏傳聞倭里罕霍卓尙在卡浪圭卡倫外盤踞並未歸巢備大兵撤後乘虛復來滋擾亦不可不慮前因賊首逃出卡外諭令法福禮毋庸深入窮追若仍在附近地方盤踞窺伺應否撥兵追剿使其遠遁或卽責成守卡官兵嚴加防堵著法福禮裕瑞妥籌辦理至外匪竄入總因卡內有奸徒勾引務當嚴密查拏以除後患法福禮等會辦善後事宜不可但顧目前致成不了之局將此由五百里諭令知之○壬寅以捐輸軍餉永廣江西鄉試中額二名清江縣學額五名臨川廬陵吉水各三名高安南城金谿鉛山安福南豐各二名豐城奉新泰和南康新城贛宜黃廣昌上饒南昌甯都石城新淦安遠各一名○甲辰會國藩奏

臣

初奉暫准守制之旨因軍

勢未定恐有後命是以未敢遽行覆奏自七月以來聞龍泉克復吉安挫失之信又聞克復瑞州進賢等城之信頃又聞九江一軍攻克黃梅縣及小池口之信仰託聖主威福江西軍務辦理得手諭旨飭令如有緩急卽行赴營之處揆度時勢自可無庸前往茲復欽奉諭旨飭臣在湖南本籍辦理團防力圖報稱聖主使臣以禮因時制宜跪聆之下感悚曷勝目下全楚肅清臣當仍遵前旨暫行守制如果賊氛不靖湖南告警所有應須籌練團防之處屆時商之湖南撫臣再行奏明辦理臣自到籍以來日夕惶悚不安自問本非有爲之才所處又非得爲之地欲守制則無以報九重之鴻恩欲奪情則無以謝萬世之清議惟盼各路軍事日有起色仰紓宵旰之憂卽臣恪守禮廬寸衷亦得稍安得旨江西軍務漸有起色卽楚南亦就肅清汝可暫守禮廬仍應候旨大臣

出處以國事爲重抒忠卽爲全孝所云懼清議之訾猶覺過於拘執也○乙巳予廣西殉難總兵官蔣福長祭葬世職謚忠愍○予廣東陣亡州判陳奉璋祭葬世職○丙午諭軍機大臣等福濟等奏廬州喫緊督兵堵剿一摺安徽捻匪自六安分竄舒城圍撲桃鎮後見又竄至上派河中派河等處意圖窺伺廬州雖經鄭魁士督隊將南路之匪攻剿獲勝福濟亦由梁園進紮店埠調度各軍以防巢湖賊眾並派總兵吉順防守店埠後路而捻匪水陸並進情形實屬喫重見在鄭魁士未暇進攻舒城著福濟就見有兵力協同該鎮先行保固廬州毋令郡城稍有疏失俟內竄之賊擊退後仍督各軍進攻舒城不得株守一隅致該逆窺我虛實復生覬覦至李孟羣退守獨山鎮實因賊眾兵單不敷堵剿勝保接奉前旨當已由陳州折回正陽著卽迅赴六安與該藩司合力攻取俾

廬城賊匪知我援師將集不敢專注廬州正陽甫經克復地勢亦
關緊要著袁甲三嚴密布置以防回竄李孟羣所需兵餉已諭英
桂籌撥接濟矣將此由六百里各諭令知之○諭福濟奏李孟羣
需餉甚急請於陝西月解皖餉內截留銀一萬兩並請飭河南省
每月淮撥銀一萬兩等語淮南賊勢蔓延李孟羣一軍見由六安
西路進攻勦辦正當喫緊月需餉銀爲數甚鉅雖經福濟設法湊
撥而道路梗阻能否達到尙未可定豫省與李孟羣行營相距較
近著英桂飭知瑛桀仍於陝西月解皖餉二萬兩由豫經過時就
近截留一萬兩迅解李孟羣行營毋稍遲誤此時李孟羣雖在皖
境實遙助豫軍英桂自應不分畛域就近接濟著每月定準協撥
該藩司行營銀一萬兩一併搭解至豫省奉撥皖餉尙欠八萬餘
兩並著陸續籌解以清欠款將此由五百里諭令知之○諭本日

據福濟奏副都統銜侍衛容照年老身弱臥病在牀精神不能周到委員每多蒙混作弊見在宿州地方安堵無庸大員坐鎮請飭回旗等語容照帶兵駐紮宿州已歷數年昨據奏報疊獲著名捻首宿州西南一律肅清請鼓勵出力員弁業經降旨允准福濟所奏是否屬實邵燦等近在清江見聞較確卽著查明容照果否年力衰邁其歷次所報勝仗及所保員弁有無虛飾冒濫據實具奏宿州地方應否另派大員駐紮或卽責成地方官按拏土匪之處並著體察情形一併具奏將此由五百里諭令知之○丁未諭軍機大臣等駱秉章奏湖南援黔官軍自克復金山寨等地方後黎平府南路東南路各苗寨頗形震懾特洞等寨均已投誠其抗不受撫者見在另籌勦辦惟錦屏永從收復以後久無官守古州鎮道亦無到任之信請飭令速行赴任以資鎮撫等語貴州錦屏等

地方經湖南援軍收復後彈壓撫綏在在均關緊要且各苗寨既樂於投誠正賴地方官迎機順導俾得迅就肅清楚中客軍勢難久駐設地方文武復不赴任則民苗之心無所繫屬深恐復滋事端著蔣爵遠嚴飭古州鎮道及錦屏永從等處文武員弁速行赴任將善後事宜妥爲經理俾地方得就乂安而湖南兵勇亦可漸次凱撤將此由六百里諭令知之○駱秉章奏撫州賊首僞國宗石逆糾吉水新淦諸賊竄聚吉水縣屬之阜田地當衝要爲臨江袁州吉安瑞州四郡所必爭臣飛飭都司楊虎臣帶所部潮勇進扼新喻縣城適卽選同知王勳行抵安福臣卽令其會同張運蘭王開化等分軍畱駐安福而自率所部趨分宜與駐新喻之楊虎臣及劉長佑蕭啟江續派之知縣劉嶽昭等相爲犄角以固袁州門戶而壯臨淮大營聲援八月二十一日賊悉眾數萬來攻爲普

承堯部勇擊敗二十二日普承堯親督後隊繼至正相地築壘賊列陣羅坊對岸蠡擁而進普承堯率勇力戰當將各路之賊擊退忽賊馬數百回撲步賊亦回旗轉戰各軍力不能支全行敗退營盤盡陷賊遂大肆屠擄袁州臨江民情震懼劉長佑念匪勢甚偏餉道將梗惟有分軍先剿援賊掩其不備盡力一戰或可轉危爲安二十至二十四二十五等日畱隊三成固守臨江長濠並咨照劉于濬派勇助守親率七成隊嚴陣於秧田中亭一帶截賊來路二十五日晡間援賊數萬悉竄太平墟欲來撲營其時臨城賊眾亦於福壽門填濠拔樁以待劉長佑以事機愈急傳令出隊江忠義等由中路鄧在富等由右路漆盛年等由左路王高來等沿河岸進發黃開先率水師戰船護之劉長佑自率親兵四路策應天明行抵距太平墟五里地方值蕭啟江及參將田興恕等由右路

至因督同進剿賊聞官軍驟至卽出布陣是時風起塵飛天色慘
黯劉長佑令各軍整隊勿動逆賊排開槍礮子如雨驟官軍屹立
如故少頃鼓角齊鳴官軍張兩翼並進衝入賊陣無不以一當十
賊眾披靡官軍乘勢蹴之立踏賊營六座賊旋以馬隊來衝劉長
佑令槍礮隊分左右斜轟馬多擊斃餘皆反奔賊遂大潰官軍追
至太平市口賊復卓旗轉戰鄭其華盧秀峯繞由街後擊之賊復
敗走將賊營一律踏毀追近黃岡地方始收隊回營是役破賊營
四十七座約斃賊三四千生擒三百二十餘名奪獲大銅礮五尊
擡槍二百六十桿鳥槍五百七十二桿大小旗幟二千五百餘件
賊夜遁羅坊王勳張運蘭王開化等於二十五六等日先後馳抵
新喻縣城聞賊竄太平墟卽於二十七日會同楊虎臣崔大光劉
嶽昭各率所部進剿行至濠湖洲地方賊一擁而出王勳等率勇

直前陣斬六百餘名追至羅坊連踏沿河賊營十餘座賊泗水過河官軍乘之槍擊矛戳斃賊無數王勳等仍揮令各軍回駐河岸以劈山礮擊之紛紛倒斃餘賊由陵上一帶回竄阜田計共斃賊千餘臣維臨江踞賊被官兵攻圍窮蹙潛約賊援竄擾臨江大營後路冀解城圍兼思乘虛伺隙復陷袁瑞兩郡其計甚狡當峽江被擾羅坊軍潰之時賊氛逼近人情洶洶劉長佑於奇險之中出以鎮定卒能掃除劇寇轉危爲安其志慮忠純實爲可取見在城賊屢敗其勢斷難久支臣已飭張運蘭王開化等率所部湘勇全軍由新喻速進並飭接帶湘後營劉騰鶴由羅坊速進相機會剿節節肅清俾臨江大營可無他慮此次出力文武員弁兵勇可否仰懇 天恩准 臣 保奏又奏據知府張運蘭王開化都司楊虎臣等稟稱九月初七日軍進白沙探報石逆敗竄阜田復又分股回

勦劉田上劫各處張運蘭等以峽江縣屬橋步灘當阜田之衝遂於初八日拔營前進行至獅子山甫欲安營遙見營南廟前一帶賊眾蟻集約八九千人營西有賊一股已至橋頭約六七千人張運蘭等分軍禦之西路賊先至官軍連開劈山礮轟斃悍賊十餘名賊卽敗走官軍從後掩擊共斃賊七百餘名南路賊覘知西路賊已敗遂亦逸去初九日南路賊復傾巢而來張運蘭王開化潛分所部爲六隊嚴陣以待賊倏進倏退官軍屹立不動未刻中營鳴鼓爲號分馳疾進截賊爲數段奮威衝殺燒其沿途棚廠追至桐下賊復踞所築四大壘開槍抗拒張運蘭王開化卽選從九品楊安臣各督所部四面蹙之賊向南奔潰官軍乘勢破其四壘斃賊數百賊委棄輜重米糧山積張運蘭等下令焚之又追賊至田心地方始收隊歸伍是日共斃賊一千三百餘名生擒賊一百三

十二名官軍無一傷者據生賊供僞國宗石逆見踞阜田嗾僞指揮胡姓陳姓僞將軍周姓岑姓率黨窺分宜新喻兩縣以圖袁州府城而解臨江之圍不料官軍先到勢不得逞臣維臨江一郡居江西西路之中地當水陸衝途最爲緊要逆首石達開之竄江西先陷此郡布置已定始陷吉安而趨撫建逆賊旣以此爲老巢各渠目悉力援救自在意中頃接探報石達開率逆黨數萬自安慶渡江竄踞建德若由建德竄浮梁趨饒州則與撫建之賊合吉安臨江賊燄必張應請飭下福興嚴扼該省東路勿令竄越庶西路得以次第整理臨江一下兵力更厚自可收節節肅清之效上諭本月十四日據耆齡奏報阜田賊匪圖援臨江調集兵勇由峽江新喻分路迎剿此次駱秉章奏劉長佑等大獲勝仗轉危爲安臨江當可得手惟據稱探聞逆首石達開率黨數萬自安慶渡江

竄踞建德捕獲賊謀均有向該逆求援之說儻自浮梁趨饒州與撫建賊合則上游賊勢復張請飭福興嚴扼東路勿令竄越等語福興見已進軍弋陽擬由東鄉一帶進攻撫州自必籌及饒州後路俾建德之賊不能與撫建會合勦辦方有把握李定太一軍見由進賢進剿東岡李元度一軍見由貴溪進剿高阜著福興就近督飭速籌兼顧惟兵力尙恐不敷前據耆齡奏派吳坤修赴進賢與李定太之軍合成四千餘名又派李新華赴杜家園與周鳳山之軍合成四千餘名均分路進剿撫州普承堯一軍四千餘名俟阜田蕞事後卽赴撫建均由福興督率調度以上兵勇諒已先後拔營見在東路情形喫重著耆齡卽飭帶兵各員迅速分路前進並著福興相機布置嚴防該逆率眾來犯至福興請調廣東官兵昨據葉名琛奏報已派總兵壽山帶兵二千名由汀州一路前進

此項官兵如抵江西福興一軍兵力稍厚卽當會合速克撫建並嚴扼廣饒門戶毋誤事機將此由六百里各諭令知之○予江西殉難教諭胡熙奎祭葬世職○是月蠲緩廣西興安等三十九州縣暨萬承等四土州上年額賦並應徵兵米免湖南巴陵二縣蘆課銀

東華續錄

咸豐七十六

臣王先謙敬編

臣陶澐宣恭校

冬十月戊申朔享太廟○官文都興阿胡林翼奏湖北下游官

軍乘勝圍攻九江並進規湖口以聯江楚兩軍聲勢適接探報知湖口賊船增至數百號圖援九江九月初七日李續賓楊載福等商派陸勇由下游襲攻湖口之背水師夾攻於前密約內湖水師彭玉麟同日大舉李續賓遂調各營聲言接剿宿太等縣卽於初七日渡江是夜四更拔營楊載福亦由水路直下總管巴依爾呼蘭等馬隊亦由陸路馳赴八里江岸一帶初八日水陸各軍齊攻湖口縣附近之七里冲三街市月臺山等處賊壘水師復上下轟擊焚奪賊船不下千餘隻至初九日早卡壘盡破李續賓與楊載

福等督勇架梯緣城並將火箭射入城中適燒該逆火藥局響聲震天滿城皆火賊眾洞開城門竄逃當將縣城克復其梅家洲偽城亦經兵勇攻拔我軍分道邀擊追殺二十餘里斃賊二千餘名燒斃溺斃者不可勝計臣等查該逆盤踞湖口已將五載今幸埽積年負固賊窟而外江內湖水師聲息相聯千里江面一律肅清使潯城之賊援斷路窮實足以使天討而快人心再臣胡林翼於克復小池口後暫駐九江營內將勦守事宜籌商周妥於九月初一日回省上諭內閣該逆盤踞湖口已及五載見將縣城克復著官文等督飭水陸各軍乘勝進勦迅埽賊氛以清江面○諭勝保袁甲三奏勦匪連獲勝仗並攻破韓圩一摺官軍自平毀姚鄧二圩後捻匪堅守韓圩賊巢時出滋擾總兵朱連泰一軍於余家集耿皇寺靈臺廟一帶斬獲甚多總兵史榮椿一軍移營韓圩

西北之大陳家莊擊斃馬步賊百餘名該匪復分路來擾均被官兵擊退韓圩之賊傾巢而出經官軍設伏進攻擒斬無算追殺十餘里立將韓圩賊巢平毀其擒首王允功等先經正法甚爲得手著勝保等飭令史榮椿等將馬賊埽除淨盡毋畱餘孽○諭蔣蔚遠佟攀梅奏勦辦苗教各匪疊獲勝仗一摺貴州下游苗教各匪於七月初七等日復來麻哈城外肆擾經佟攀梅派守備張元謨等進勦斃賊數百名賊匪分股來撲又斃數百名賊首五名紅袍苗匪三名燒毀賊棚二十餘間餘匪逃竄又六月十五等日黑苗竄擾都勻經都司王萬祥殲斃賊二百數十名閏五月二十六等日苗匪來攻獅子巖營盤蔣玉龍等督兵迎勦開放大礮轟斃賊目一名餘賊數十名賊仍抗拒復斃賊目數名賊匪數百名餘匪奔潰此次各路勦匪尙爲得手著蔣蔚遠等激勵將弁迅埽賊氛

毋畱餘孽○諭軍機大臣等勝保等奏軍營需餉孔殷請飭山東迅速籌撥等語勝保自攻克正陽關後兵勇雖經裁汰惟河南藩庫支絀不能以時接濟勝保計日帶兵南剿必須兵餉充足方免貽誤著崇恩於山東藩運二庫迅速籌撥銀五六萬兩分起解赴勝保軍營以資接濟毋稍遲延將此由五百里諭令知之○諭官文等奏請仍飭四川山陝三省按月撥餉等語湖北官軍已於九月初九日克復湖口縣城奪毀梅家洲賊壘水陸兵勇正可乘勝攻擣九江而各營口糧欠發甚多當此事機順利亟應迅籌接濟以期士飽馬騰爲節節掃蕩之計著有鳳恒福會望顏各遵前旨按月籌撥五萬兩陸續解赴湖北軍營以濟要需將此由六百里各諭令知之○予貴州陣亡知縣陳世鑣祭葬世職○賞在京八旗及綠營兵丁半月口糧○己酉 上幸圓明園○庚戌諭內閣

端華僧格林沁會同刑部奏大員被參案內訊取供詞請旨定奪
一摺已革理藩院尙書步軍統領聯順廢弛營務信任慶陽納賄
縱容家人索賄並失察屬員侵蝕公項及濫保營員各項業經端
華等逐款訊明惟得受錢糧房錢文一節據慶陽等供係面交而
聯順恃無見證堅不承認聯順身任大員罔知自愛被參贓款研
訊非虛豈能任其狡展以致案懸莫結朕不爲已甚免其刑訊著
端華等卽照眾供確鑿之例定擬罪名具奏所有案內各犯一併
定擬奏結○諭英桂奏官軍追剿捻匪連獲大勝見飭接捕餘匪
一摺河南捻匪自紅嶺土山被剿窮蹙翻山奔竄至南召縣界之
曹集糾合山內土匪復有二千餘人總管德楞額等越山追剿斃
賊百數十名餘匪翻山我兵追獲八十餘名該匪由山後竄至黑
驢溝及馬市坪等處盤踞我軍乘夜進兵設伏誘擊槍礮齊進忽

見馬市坪煙燄騰天伏兵大至前後鈔殺餘匪拋械登山復經龍澤厚等伏兵齊起乘勝進追連越五山三十餘里統計此次兜剿共斃賊一千六百餘名擒斬賊目十餘名其在逃殘匪復經魯山縣知縣高天寵等督率勇團格殺及落水死者數十名此股敗殘餘匪此拏彼竄狡黠異常英桂飭令德楞額等追殺數百里辦理尙屬妥速見在裕州泌陽等山內尙有零匪潛匿仍著英桂嚴督帶兵員弁分路接剿以除萌孽而安地方○諭軍機大臣等前因倭里罕霍卓逃出卡外諭令法福禮如該逆仍在附近地方自應酌籌追剿茲據該大臣奏稱移營七里河沿相機句捕拏獲賊犯知倭里罕尙在倭胡蘇魯爾游奕見已派兵赴喀浪圭卡倫堵剿並催錫拉那等出卡兜拏籌辦尙合機宜各莊回眾經該大臣等安撫開導業已不肯從逆倭里罕勢孤力竭自不敢復來窺伺見

在附近各卡均撥兵接捕如該逆尙在附近地方不難擒獲正法以絕根株儻畏威遠竄亦不必深入窮追仍應責成守卡官兵嚴密梭巡杜其偷越以免後患法福禮等見在籌辦善後事宜總須先清內匪以杜其勾引嚴定守卡官員處分以固我藩籬使該逆無隙可乘庶可爲日久乂安之計布置既定所有官兵亦可酌撤以節勞費將此由五百里諭令知之○何桂清趙德轍奏俄羅斯船於九月十四日駛至吳淞口十八日法蘭西緝譚李梅帶同該夷官明常謁見蘇松太道薛煥聲稱該國大臣普提雅廷見在船內並呈出照會經薛煥催令起碇該船卽於十九日出口奏入諭何桂清趙德轍妥籌辦理嚴密稽查○辛亥胡林翼奏查水師一軍建議於江忠源勦造於會國藩而整理擴充至近年而始大戰艦輜重八九百號大小砲位二千尊江漢之師如雷如霆軍聲不

爲不盛惟是出楚入吳風利不泊卽瓜步金陵均可隨機勦辦其
應與吳皖統兵將帥互相策應之處旣非李續實楊載福彭玉麟
所能咨商而李續實楊載福彭玉麟之落落寡合亦非他省將帥
所能調遣且軍旅之事以一而成以二三而敗唐代九節度之師
潰於相州其時名將郭子儀李光弼亦不能免蓋謀議可資於衆
人而決斷須歸於一將此又軍事之大較矣楊載福彭玉麟經會
國藩拔識於風塵之中自湘潭出師以至今日久已分爲兩部卽
不能統爲一軍在該員本無不和在兩營弁勇卽有才力不相上
下之勢是該鎮道又不能互爲統轄查丁憂兵部侍郎曾國藩持
躬謹慎早邀 聖鑒水師將弁皆其舊部吳會形勢扼塞之要尤
所畱心前請終制蒙恩暫准曾國藩讀禮家居曷嘗須臾忘天下
哉茲幸機勢可乘東南大局時不可失移孝作忠出而任事天下

後世將信其忠而必不能責其不孝應請飭下會國藩迅速啟程
由鄂抵潯卽日督同楊載福彭玉麟李續賓等水陸各軍會同將
軍都興阿長驅東下都興阿忠勤素著馬隊勇敢冠軍素與南勇
將士一力一心必可豫操勝算抑臣更有請者軍興以來凡官軍
所到之處賊必嚴爲之備我軍銳意仰攻礮石所及徒損精銳積
日累月壯氣潛銷悍賊乘之轉至於敗又賊之詭計以堅守綴我
兵力轉於無兵及兵弱之處狡焉思逞循是不變將兵日見少而
賊日見多矣竊計以陸師精兵六千人另籌每月船價銀二萬兩
雇民船四百號從水師之後仍帶長夫鍋帳並二月米糧軍火遇
皖南皖北江南有賊之處隨機雕勦我兵所至皆賊計之所不及
防迫聞警調援我軍卽可迎戰抑或堅守不出我兵亦可改圖兵
到之後賊必設備設備之後兵可遡歸兵歸之日賊必弛備弛備

之曰兵可再出不數月而賊技必窮惟是以奇兵雕勦在乎審機
觀變無論南岸北岸江界皖界應飭帶兵大員覘賊所在不拘守
成法不頓兵堅城不爲鄰省所節制不爲賊情所牽綴動靜之機
默存於心若稍有沾滯兵機必鈍又兵勇之敢戰者傷亡必多九
月初八初九湖口之役水陸中傷共九百餘員名亟宜調回武漢
加意休息以養士氣仍以精兵調赴下游彌縫其闕更番疊戰如
環無端庶不至拘滯一隅轉誤大局應請以九江爲老營根本仍
以武昌爲換防並糧臺根本則餉稍不匱而士氣常新庶於討賊
機宜大有裨益愚昧之見如蒙 聖明採擇可否一併飭下曾國
藩議覆施行 上諭軍機大臣等官軍克復小池口湖口縣兩處
九江已成孤立之勢卽日攻克水陸大兵卽可相機東下所奏不
爲無見惟曾國藩丁憂後奏派楊載福總統外江內湖水師彭玉

麟協同辦理業經允其所請朕因該侍郎懇請終制情詞懇切且江西軍務漸有起色是以令其暫守禮廬楊載福等統帶水師旣已著有成效自應仍歸該總兵等相機調度以專責成會國藩離營日久於見在進剿機宜能否確有把握尙未可知若待其赴潯督辦恐需時日轉懈軍心胡林翼久厯戎行於軍務尙爲熟悉著將省城公事趕緊料理卽行馳赴九江與都興阿楊載福等會商妥辦務使各營將士同心勦力以期迅殄逆氛共膺懋賞該撫奏稱奇兵雕勦在乎審機請飭帶兵大員覘賊所在不拘成法不爲賊所牽綴等語此係出奇制勝之法見在若能抽出一軍卽可照此辦理著該撫與官文都興阿楊載福等商辦正不必待會國藩到楚方能定議也至受傷兵勇調回休息仍調精兵彌縫其闕亦屬可行著與官文等一併籌畫辦理將此由六百里諭令知之○

諭本日據福興奏逆匪合犯貴溪督軍扼剿瀝陳兵單情形並耆齡奏克復東鄉籌辦省東防剿各一摺官軍攻克東鄉縣城前經福興奏到已令該將軍飭李定太乘勝進剿金溪以孤撫州賊勢該撫見又抽調營勇三千餘名前赴東鄉歸李定太調遣茲據福興奏稱皖省大股逆匪闖入江境會合撫州匪眾南北夾犯貴溪統計股匪前後六起數逾三四萬人貴溪孤城被撲並恐由歧路紛竄廣信該將軍已拔隊前赴該邑援剿自應先就見有兵力迅解貴溪之圍兼顧廣信門戶但隨營兵數不及千名防剿兩形不足李定太一軍素稱得力加以此次由該撫抽調之勇爲數已多即可飭令策應貴溪弋陽等處其普承堯等所統湘寶各勇如卽將阜田賊匪掃蕩亦可馳赴東路協剿此外有無可抽撥著福興耆齡會商辦理惟不可專顧一隅致他處或有疏失將此由六百

里各諭令知之○追予江西陣亡直隸州知州劉騰鴻父母正四品封典知府李新華等祭葬世職○王子福濟鄭魁士奏楚北竄回逆首李秀城糾邀潛太桐舒各處踞賊號稱數萬合併捻匪一股由派河直撲廬城一股由巢湖直撲店埠一股由巢縣夏閭直撲柘皋意在分路突入臣鄭魁士督同廬城各營進擊派河之賊臣福濟督飭水師戰船進擊巢湖之賊並分飭總兵吉順進擊夏閭之賊九月二十一日該逆竄至二十里鋪築壘七座欲撲廬城臣鄭魁士卽傳令各隊於二十二日五鼓會齊前進逆眾由數路蠡擁而來先派協領桂成帶熱河固原大同潛山各兵爲後應臣鄭魁士卽親督遊擊余成蛟等帶宣化陝安兵廣克勇由中路進副都統麟瑞等帶吉林馬隊凱銳勁勇由東路進總兵扎隆武等帶漢中山東四川兵由西路進該逆恃眾抵撲我軍擊斃賊捻不

下千餘該逆退保巢壘各兵勇愈殺愈進直抵賊巢臣鄭魁士帶領各軍圍撲賊營全行踏毀營賊無得脫者三河派河各處賊匪齊赴援應我軍盡力衝殺約斃賊三千餘名巢縣逆匪句合湖北竄賊於九月二十日分水陸兩軍進踞夏閣橋東沿河一帶修築木城數座欲襲柘皋大營臣福濟卽飭總兵吉順派隊迎勦二十一日我軍馬隊先至楊徐山賊匪遽擁迎戰騎兵將槍箭衝放賊奪路奔回營總烏爾滾布等當先衝殺夏閣劉家橋各賊齊來接應經吉順等各帶馬步兵左右擊刺賊眾大敗尙阿布督兵直偪木城張遇春撲入賊營各軍紛擲火罐官兵練勇乘勢殺入卽將木城四座踏毀餘賊向東逃逸我軍跟蹤追殺斃賊甚多其水路賊船見木城攻破卽揚帆而去官軍由岸山追趕中槍落河者無數守備王聯陞等梟水追殺奪獲賊船三隻燒毀糧船四隻二

十二日該逆復回竄夏閭仍飭吉順帶隊迎擊賊眾狂奔入城卽將夏閭賊壘卡館全行埽平據生擒賊供逆首李秀城約會巢城偽先鋒黃和錦等有由施口進撲撮鎮船礮直攻店埠繞至廬城之謀臣福濟先飭知州黃際昌等迎擊一面派令總兵嵩瑞等整備接應二十日探明逆船百餘隻分泊湖邊陸路之賊欲往塘口河搭橋內竄二十一日都司黃國堯紮出施口西向以禦丙子鋪逆船守備范玉林東向以禦姥山逆船黃際昌約集團練沿岸助威哨官楊宏勝等帶三板船十隻南向直擣孤山之賊該逆以戰艇二十餘列陣抵敵我軍衝鋒而入礮手梁文昭躍上賊船斬偽將軍楊萬復首級逆船起碇回竄我軍圍住開礮逆眾情急投水黃國堯等督同哨官水勇分上賊船擒獲偽指揮陳尙林等多名奪獲逆船十二隻燒毀及沈水者十一隻嵩瑞等趕帶店埠兵勇

前往接應並將陸路援賊同時擊退旋據探報姥山賊船連夜遁回巢縣其丙子鋪逆船移泊蔣口二十三日又竄至塘口河范玉林親率三板十三隻布陣圍剿擊破賊長龍船一隻該逆紛紛落水各勇乘勢緊攻逆匪轉舵南竄我軍尾追二十餘里燒毀賊船五隻奪獲六隻臣等查前次舒廬和州水陸獲勝欽奉諭旨准卽查明彙保此次各路大獲勝仗應懇 天恩俯准擇其尤爲出力者併案保奏以資鼓勵 上諭內閣湖北竄回逆匪糾合皖省髮捻各匪分股竄撲廬城店埠柘皋等處經水陸各軍分路進剿斬馘逆匪數千將士用命大挫賊鋒出力員弁准其併案擇尤保奏以示獎勵○以迎勦竄匪出力賞還提督銜總兵鄭魁士頂帶花翎○甲寅諭軍機大臣等據法福禮奏官兵出卡追勦賊匪至黑孜倭依地方大獲勝仗因卡外道路迷漫礙難深入已飭業布冲

額巴哈善撤兵歸營仍令錫拉那伊綿阿退兵沿卡駐紮密探賊蹤並諭知浩罕伯克及布魯特如倭里罕逃至該處卽行縛送各等語賊首倭里罕如尙在卡外附近地方盤踞恐其復圖進卡自宜設法擒獲以絕根株今業已遠遁儻日久並無蹤迹卽著飭令錫拉那等將駐紮沿卡官兵酌量撤回法福禮等見在籌辦善後事宜總須布置嚴密自固藩籬使卡內無奸徒勾結自可絕外匪窺伺之端將此由五百里諭令知之○予湖北陣亡訓導姚元余等祭葬世職○丙辰官文都興阿胡林翼奏臣等於小池口克復後偵知逆眾固守九江當卽咨行水陸各軍襲取湖口惟該逆盤踞湖口以來拆毀舊城於下鍾山自麓至頂疊石重關築城如帶復於西岸梅家洲堅築僞城掘濠植樹與湖口對峙以通援應八月內湖口賊船將分路進援九江李續賓楊載福商同內湖水師

惠潮嘉道彭玉麟設計水陸夾擊訂期九月初八日進剿初七日李續賓令李續宜率營官何紹彩等馬步各隊攻梅家洲僞城自率湘凱各營渡江揚言投勦宿松太湖是夜駐師張家壩四更後潛率李續燾胡裕發並副右副左中右各營紆曲繞道伏於湖口後山梁作楫等伏於山麓俟水師得手水陸夾擊黎明時彭玉麟派遊擊蘇在位等攻湖口之東遊擊鄧翼升等攻西岸梅家洲賊船參將劉國斌由中路橫排接應賊分兩岸迎拒都司羅勝發中礮陣亡後隊繼進拋擲火彈賊船火起我軍乘勝擒斬焚奪賊卽紛紛投水先是楊載福於初七日派參將孫昌國等以長龍三板分載陸勇虛作聲勢以待接應自率各營於初八日抵湖口縣派參將萬化林等攻梅家洲賊船參將李朝斌副將李成謀等於下鍾山賊船大幫停泊之處上下夾攻至是會合彭玉麟水師揚

帆直進北風大作舟駛如飛兩岸及城賊同時開放大礮各軍鏖戰多時忽陸師由山頂破空而下賊遂大潰我軍以刀斧火炬斷其鐵練偪賊船於崖下計殺斃燒斃溺斃者二千餘人將船焚奪一盡維時梅家洲賊船亦焚毀無遺五更時我兵飛火箭入城中適中火藥瓦石飛空牆壘迸裂賊開城奪路而出我軍乘勝追殺楊載福彭玉麟水師分道繞截又殺二千餘名生擒偽總制陳中理等二百餘名湖口縣城卽日克復梅家洲之賊見湖口已破不戰而逃李續宜等由閘道繞出賊前聚而屠之無一遺者十三日楊載福帶外江水師彭玉麟帶內湖水師又奪彭澤縣城船數十號攻破小孤山賊卡江面一律肅清見飭水陸馬步專注九江以期建瓴東下迅掃妖氛所有戰功懋著之水陸員弁謹隨摺繕單籲懇恩施其餘出力員弁兵勇並傷亡將士容分別查明具奏按

察使李續賓等應請恩施先行分別獎敘都司羅勝發奮勇捐軀實堪憫惻請照參將例優卹把總胡永和陳長勝均請照千總例優卹外委易玉佐六品軍功彭瑞益彭雲漢常晉臨敵陣亡均請照把總例優卹 上諭內閣湖北水陸各軍克復江西湖口縣城並將梅家洲賊匪偽城同時攻拔上游江面一律肅清李續賓等督率諸軍出奇制勝洵屬可嘉布政使銜記名按察使李續賓著遇有布政使缺出由軍機處提奏總兵楊載福著遇有提督缺出由軍機處提奏廣東惠潮嘉道彭玉麟著賞加按察使銜候選知府李續宜著免選知府以道員選用羅勝發等均著照所請優卹○官文都興阿胡林翼奏小池口克復後臣都興阿當卽分兵駐守一面分撥馬步兵勇進剿宿太連日偵知安慶桐城潛山來賊萬餘盤踞太湖已分股竄至楓香驛涼亭河一帶又宿松一路亦

有石牌賊匪數千竄至桃花鋪乘我軍營壘未就意圖乘虛攻撲
擾及蘄黃邊界而涼亭河距我師進紮之二郎河僅二十餘里九
月十九日翼長多隆阿由宿松率馬隊會同副將鮑超步隊至祝
家塆一帶值賊匪分路出撲我兵亦四路迎敵營總薩林祿昌左
右鈔截正遇伏賊蠶起薩林等率馬隊縱橫衝突殲斃騎馬悍賊
多名餘賊四散奔逃我兵追殺斃賊又千餘名生擒長髮老賊五
十餘名正法將涼亭河一帶賊壘十餘座全行平毀查點兵勇亦
多受傷俟查明分別辦理報聞○丁巳諭軍機大臣等前據駱秉
章奏貴州錦屏永從等處業經湖南援軍收復請飭蔣蔚遠速令
古州鎮道及錦屏永從等處官弁赴任經理以便湖南兵勇撤回
當經諭知該撫遵照辦理茲據蔣蔚遠奏六洞首逆黑大漢等見
尙竄伏少洞古州朗洞上下江等處亦未克復教匪余老科仍在

太平山屯聚或恐湖南兵撤而苗匪復來滋擾請飭暫緩撤兵駱秉章撥兵援應原屬不分畛域黎平接壤湖南所有前派之兆琛一軍既能得力著暫畱協勦蔣蔚遠身任封疆豈可以該省勦匪要務盡行委之他人著卽飭令代理黎平府知府多文參將慶瑞等乘此楚軍得力督率兵練會同進勦以期盡殲醜類毋得一籌莫展專恃鄰省救援致干重咎將此由六百里各諭令知之○己未諭軍機大臣等勝保袁甲三奏擬先清北路再勦六安並李孟羣兵潰請撥兵勇馬匹各摺片韓圩賊巢經官兵攻克餘匪劉老淵等勾結土匪擾及甯陵商邱等處勝保等已飭史榮椿朱連泰跟蹤追擊渦淝兩河餘黨時聚時散蒙亳一帶道路仍然梗塞勝保等擬將豫皖毗連之境一律肅清再行移師六安著卽照所籌辦理至李孟羣孤軍深入屢次失利見在退紮麻埠情形頗爲喫

重前據官文等奏已派翼長多隆阿等帶兵數千由宿太一帶進
剿以爲李孟羣聲援勝保等須嚴飭慶瑞賽沙布相機前進與李
孟羣會合不得徒爲株守之計英桂督剿豫省西路匪徒漸就肅
清能否將格綳額等馬隊調來勝保軍營卽由勝保等咨商英桂
辦理勝保病假將滿如果有可乘之機著卽與袁甲三會商進兵
肅清賊類毋得遷延時日致負委任將此由六百里諭令知之○
諭勝保袁甲三奏李孟羣退守麻埠請飭湖北迅撥兵勇越境堵
剿等語六安州大股賊匪竄至獨山李孟羣兵潰退住麻埠勝保
等因北路伏莽未清尙難前赴六安會剿其派往馬隊僅二百名
另派慶瑞賽沙布等援兵尙須由霍邱節節進剿當此賊氛猖獗
該藩司兵力較單急須撥兵策應前據官文等奏派馬步兵勇數
千人交翼長多隆阿副將鮑超帶往宿太以爲李孟羣後路聲援

並據奏報獲勝等情著官文等卽飭該翼長等就近迅赴麻埠一帶援應合力進攻六安毋稍遲緩將此由六百里諭令知之○勝保袁甲三奏鳳臺縣文生苗沛霖經臣等派把總邵徵祥廩生王尙辰前往申諭嗣接該生稟覆情願來營謁見察其情詞頗知感化適據蒙城縣知縣俞澍稟稱淝北餘捻竄豐家集一帶勢甚猖獗請飭苗沛霖帶練會剿等情當卽諭令率練前往會合截擊並由釐捐項下撥給銀四百兩作爲犒賞沿途不准稍有滋擾該生遵於九月二十六日率眾進剿似尙能就我範圍如果殺賊立功等擬酌量奏獎以安其心使其終爲我用彼時再當酌度情形辦理報聞○庚申諭內閣福濟鄭魁士奏官軍擊退大股賊捻攻克桃鎮收復各要隘一摺捻匪與粵賊合陷桃鎮竄擾派河經福濟等飭令協領桂成等分路進攻九月二十四五等日逆賊蜂擁

撲營壘經兵勇擊退已革遊擊聶桂榮督隊環攻搶過桃鎮北柵
外大橋直衝入街賊眾披靡敗退卽將桃鎮收復該逆復糾合舒
城廬江賊匪接應上派河之賊舒城縣知縣甘文淵等截扼其後
鄭魁士督同副將蕭開甲等分路前進兵勇齊抵北岸趕搭浮橋
過河突進奪燬賊卡二座賊眾奪路竄出我軍伏兵喊殺逆賊頭
營已破後營火起同時潰散馬隊跟剿甘文淵等由後路兜擊福
濟豫派廬州府知府馬新貽等援助截殺該逆由東南竄逸又被
水師擒殺殆盡當將上派河中派河賊營二十餘座躡毀擒賊七
百餘名斃賊不計其數此次水陸進攻次第收復各要隘賊鋒大
挫著福濟等乘此聲威激勵將弁迅圖進剿毋稍延緩○諭軍機
大臣等福濟鄭魁士奏餉需不繼請飭山陝兩省按月準解等語
據稱山西應解七月分餉銀陝西應解七八兩月餉銀俱未經撥

解見在皖省勦賊喫緊全賴各處協撥若不按月準解兵勇飢潰堪虞且停兵待餉必致坐失機宜著恒福會望顏將應解皖餉按月一準撥解毋稍遲延如能於每月二萬兩外再行籌撥銀一萬兩更足以資接濟該撫等務當酌量情形設法措解毋誤要需將此由五百里各諭令知之○癸亥諭內閣和春奏官軍攻勦鎮江逆匪疊獲大勝一摺並水師勦匪獲勝等語鎮江逆匪被勦急迫於東北兩門及甘露寺等處疊次出撲經總兵余萬清等分投迎擊張國樑知逆匪欲圖西竄接應金陵援賊先於高資地方添營扼守該逆果於運糧河之北潛築營壘張國樑派參將余兆青等四面進攻並親督兵勇過港直撲賊營都司賴鎮海亦督率水師開礮轟擊將賊壘礮臺踏平守臺逆匪悉被殲斃官軍乘勝進攻六擺渡賊營立將逆壘平毀張國樑復親督兵勇渡過運河卽補

副將馮子材等首先搶入賊壘奮力擊勦其摩旂山賊眾經總兵虎嵩林等會合攻勦水師總兵李德麟進攻泥汊賊匪擊沈賊船十餘隻焚毀賊卡三座轟倒賊營望樓二座總兵泊承陞等復於釣魚臺獲勝此次鎮江一帶陸路攻勦接仗六晝夜之久斬馘千計水師復乘風轟擊賊勢已窮著和春等嚴飭將士迅圖克復毋再延緩○先是鄭親王端華奏籌撥京餉章程命惠親王軍機大臣等會同戶部議至是奏應如所奏以資補救並酌籌緩急分別施行一各省一切放款均令改用二兩平每年節省銀兩按季報解以充京餉一淮南淮北並兩浙能否鹽歸場竈當此餉需支絀之際該督撫等應覈實辦理一上年冬間奏撥京餉銀共四百萬兩節經戶部奏催未解應令各督撫統限年內一律解齊至無益經費有宜裁汰暫停及減成減半支給者共二百一十二款應通

行各省認真遵辦一原奏戶部每月放款擬按五千易錢銀七錢三給放應俟錢款稍裕分別辦理一原奏見在捐輸官職太輕仍照舊例銀數應由戶部隨時體察俟軍務稍定酌復舊章一地丁稅課請照舊例交納應由戶部體察各省情形隨時奏明辦理得旨各直省督撫大吏身受厚恩當茲經費支絀之時自應力求撙節共濟時艱斷不准見好市恩瞻徇情面務宜懷遵部議認真辦理○予江蘇陣亡遊擊多陞額等祭葬世職○修江蘇寶山縣海塘○甲子諭內閣前因會望顏奏參陝西官錢鋪委員候補知縣郭廷椿等那移私販並與藩司司徒照家人黃君任夥開錢鋪等情弊當降旨將郭廷椿等革職交會望顏嚴行審訊定案時並將該藩司參辦本日復據會望顏將續查虧短銀數並收買大錢漁利私錢鋪那用銀錢委員隱匿鐵錢銷燬帳本各款臚列具奏委

員郭廷椿等與管事之王迎科通同藩司家人種種舞弊隱匿侵吞爲數不少殊屬可惡該撫見在督同道府各員查覈嚴究所有舊管委員著一併提訊如有扶同侵漁情弊並著嚴參懲辦務期徹底根究毋許稍有不實不盡陝西布政使司徒照於家人通同屬員舞弊爲時已久毫無覺察實屬昏愼著先行撤任聽候該撫查辦○命候補侍郎黃贊湯以二品頂帶爲通政使○以林揚祖爲陝西布政使蔡宗茂爲陝西按察使

由通商道遷

○予河南陣亡主

簿蘇雲龍等祭葬世職典史陳福年建祠○乙丑官文都興阿胡

林翼奏楚省官軍克復江西湖口後續接探報首逆石達開渡江

會集都昌鄱湖各賊盡踞景德鎮行止尙無定向而賊目賴桂英

等踞守彭澤實爲下游肘腋之患

臣

官文等復飭水陸各軍急攻

彭澤牽制石逆以免回援金陵九月十七日李續賓將老營畱紮

湖口同楊載福師船直抵彭澤縣境距城五里有小孤山挺立江中逆眾於南北兩岸修築石城環以深濠僅畱一門一路曲繞而進楊載福等商議先攻北岸僞城調巴克坦布等馬隊由橫壩直趨小孤山北岸又派楊得武率湘凱各營回湖口縣直趨小孤山南岸二十一日楊載福畱都司楊明萬礮船轟北岸僞城自率大隊戰船向舊城排礮一周卽往下游進發李續賓飭各勇夫於距僞城三四里多修營壘佯作長圍之勢自率親兵梭巡城外拔取木椿忽該逆出隊抗拒我軍奮勇迎戰賊匪退奔我軍復佯退誘之該逆又出數千人追撲李續賓令親兵排陣以待復密傳馬隊從賊後邀擊該逆大敗不能回城我軍掩殺數十里至吉水溝適遇楊載福戰船橫截轟擊殲斃千數百名餘賊向望江竄逃楊載福率師直徧望江縣境登岸搜剿敗賊斬擒殆盡卽駛下安慶維

時彭澤縣城內之賊紛紛竄逃被楊明萬率勇追殺斃賊無數二十
十二日李績寶與楊明萬以礮船轟擊南岸僞城陸勇與馬隊亦
會合輪攻至四更時見城中火起知賊已遁當飭馬步隊窮追三
十餘里沿途斃賊數百名小孤山伏賊閉門堅守我軍誘令下山
斬之此二十一二等日攻克彭澤縣並拔其兩岸僞城及勦除小
孤山賊壘之實在情形也臣等查楊載福率師進規安慶已有直
搗金陵之望見在潯城之圍功虧一簣卽當設計勦除臣都興阿
因皖逆尙熾斬黃路路可通楚境北岸勦守不容鬆勁見仍率馬
步各軍由宿太節節掃蕩相機而進以期肅清皖北專意束征
上諭內閣此次楚北官軍水陸進剿辦理甚爲得手著官文等乘
此聲威激勵將士迅克九江進攻安慶並由宿太節節掃蕩俾皖
北一律肅清○諭葉名琛奏克復廣西南甯府城一摺廣西股匪

竄陷南甯府城於五月敗回橫州後復竄至靈山經署參將廖達章等會勦連獲勝仗進追至黃地嶺大蘆村殺賊無數餘匪竄回廖達章等分兵前進將橫州各處賊巢盡行攻破賊援已絕色克精阿督兵進薄城下左江道吳德徵馳抵南甯會勦該匪潛逃設伏夾擊轟沈賊船三十餘隻獲賊船三隻其陸路竄賊俱被兵勇追殺殲除當將南甯府城克復此次勦除廣西股匪該鎮道等於失事之後勸捐募勇克復郡城辦理尙爲迅速著葉名琛督飭將弁乘勝進攻迅圖克復橫州永瀆二縣毋畱餘孽並責成色克精阿吳德徵等督率勦辦以贖前愆○戊辰胡林翼奏前奉諭旨胡林翼著將省城公事趕緊料理卽行馳赴九江與都興阿等會辦剿賊事宜等因欽此跪讀之下曷勝感奮惟全師出境必使軍無返顧之虞乃得銳意長驅節節攻勦不僅圖潯城之克復已也查

九江城賊岌岌孤立雖米糧尙足而援絕勢窮見又開濠兩重匪竄無路李續賓楊載福調度運籌早已豫操勝算萬無疏虞斟酌情形暫可不必前往且潯城旣下必有擊散之賊紛紛上竄湖北大軍移動門戶堪虞接淮勝保八百里咨稱安徽獨山軍營失利西面緊接湖北之羅田麻城屬卽迅速防勦查羅田麻城均在九江之上四百餘里亦在宿松太湖以上三四百里大兵盡駐下游賊若間道橫撲則德安安陸一帶亦必驚擾見已派兵前往堵勦如有緊急應再籌撥兵勇以昭慎重臣之步軍分防襄陽及蘄黃興國各營一時尙難抽調又瑞州克復王鑫劉騰鴻先後殞謝臨江吉安之師乍前乍卻勝敗不常查臨江距瑞州百餘里距湖北之通城崇陽亦止數百里江西內地被賊竄擾者尙有六府不僅與鄂省唇齒相依兼與湖南邊界處處相通是上游南岸亦屬空

虛設有不備則東下之師首尾受敵不可不慮又兵之所向餉項
宜籌臣見辦牙帖釐金等項漸有起色雖計每年所入僅數大營
得半之餉尙不至十分饑困惟章程初經釐定必須試行一年方
能覈實又鄂省漕糧弊竇太深今則兵燹餘生脂膏已竭更不堪
其朘削臣於九月初一日從九江回省後卽遴委道府大員澈底
清查逐縣刪減上下衙門陋規浮費一概革除見當立法之初亦
須切實整頓又臣本年馳赴下游督勦隨處察看地勢於邊界要
隘地方修築礮樓以資防守燒輒砌石須數月畢工以上各事宜
爲鄂省切要之急務亦與東征之師牽涉關繫潯城克復後東南
全局節節可圖時固不可暫失而事必策其萬全臣應俟九江攻
克再行前往會商以期地方軍務均有裨益 上諭軍機大臣等
前因胡林翼奏請飭曾國藩赴江西統率水師當諭令該撫將省

城公事料理馳赴九江與都興阿等會辦茲據奏稱九江賊勢已窮李續賓楊載福辦理已有把握暫可不必前往等語潯城一經克復敗散餘匪上竄堪虞自應嚴密設防使我兵無後顧之虞然後節節進剿方爲計出萬全至籌畫兵餉釐剔漕弊擇要設防皆係目前切要之務該撫身任地方責無旁貸著卽逐件籌辦暫時毋庸前赴九江所有攻剿事宜見有都興阿楊載福李續賓等水陸並進當可迅速奏功俟克復九江後胡林翼再行察看情形酌量進止將此由五百里諭令知之○胡林翼奏湖北通省有漕州縣凡三十有三額征北漕正耗米十五萬石有奇南米十三萬七千石有奇北漕由丁船兌運京倉南米由州縣解交荊州滿營及各標綠營咸豐三年因湖廣漕船停運部文令變價解部每石折銀一兩三錢各州縣仍照舊徵收時因省城失陷未及辦理臣自

咸豐五年三月蒙恩擢署湖北巡撫卽訪聞各州縣徵收漕糧多所浮勒大爲民病每思有以變易之適以軍事方殷無暇及此上年武漢克復楚境漸次肅清今歲雨暘時若年成頗稱豐稔漕糧可望開征不於此時設法清釐舉積弊而一更張之國計民生將何補救惟是楚北漕弊浮收之重實由於冗費之多使非先察積弊之由是猶止沸者不去其薪壅田者懼圖其蔓也臣請爲 皇上密陳之查湖北各州縣額徵米數多者二萬餘石少者二千餘石或數百石北漕南米合征分解其徵收米石者謂之本色以錢折米者謂之折色其征收折色多寡不同有本色多於折色者有折色多於本色者有本色折色各半者有全收折色者其徵收折色每石折收錢或五六千或七八千或十二三千或十五六千竟有多至十八九千者其徵收本色每石浮收米或五六斗或七八

斗或加倍收竟有多至三石零者此外又有耗米水腳等項分款另收又有由單券票樣米號錢等名多端需索民力幾何其能堪此而州縣則有所藉口也向來漕運到通時不無津貼方能挽運入都而丁船藉此需索兌費爲數甚鉅者固無論已卽見在停運免兌幫費可省而糧道有漕規本管道府有漕規丞倅尹尉各官俱有漕規院署有房費司署有房費糧道署及本管道府署書吏各有房費此冗費之在上者也又有刁紳劣監包攬完納其零取於小戶者重其整交於官倉者微民謂之曰蝗蟲更有挾州縣浮勒之短分州縣浮勒之肥一有不遂相率告漕甚或聚眾哄倉名雖爲民請命實則爲己求財也官謂之蝗蟲費種種蠹弊盈千累百無不於州縣取之其派撥南米者撥定後由州縣自運交荊州府衙門或交本色或交折色其交本色者正米耗米之外尙需雜

費銀兩甚多其交折色者每米一石或二兩或三兩不等費未交足米故遲收此冗費之在南米者也夫州縣既多冗費勢不能不向糧戶浮收州縣既有浮收勢不能不受刁民挾制於是大戶折色之價日減小戶折色之價日增土棍豪衿多方抗欠猾胥蠹役從中欺侵各州縣雖勒折浮收閒有所得半皆耗於上下冗費之中而國家維正之供往往徵不足數則相率捏報災歉藉緩徵爲騰那而漕政因之益壞百餘年來日甚一日東南數省積弊相同而湖北則幾有不可挽回之勢矣湖北見當兵燹之餘私認有漕州縣仍照前此之每石十餘千收取必致民困難甦有負 皇上軫恤凋殘愛養民生至意 臣自九江旋省日與省中司道武漢二府晝夜籌商立意減漕以甦民困竊謂欲禁浮收當先革冗費見已遴委道府大員馳詣各州縣體察情形破除情面分別刪減嚴

立限制明立章程榜之通衢俾窮鄉僻壤一律周知貪吏猾胥無從欺隱取中飽之資以分益乎上下務期積弊盡除民力藉以稍紓國賦得歸實濟易云窮則變變則通通則久此其時也然積重難返弊已百年利之所在人人得而爭之一旦發其痼疾窮其利藪取而還之於民歸之於公將必有疑之怪之且從而謗毀之者

臣愚以爲苟利於國苟利於民孰殺之歌在所不恤臣膺封圻重寄錢漕係臣職守漕弊一日未清臣職一日未盡除俟辦有端倪

再行另摺陳明謹先將湖北漕務積弊亟當清釐情形縷晰密陳伏乞 皇上訓示遵行得旨所奏實屬剴切汝能不顧情面祛百年之積弊甚爲可嘉俟辦有端倪再行具奏○己巳諭軍機大臣等連日據德興阿和春奏報瓜州鎮江疊獲大勝情形兩處逆匪均已窮蹙南北兩岸布置周密一旦攻克鎮江該匪逃竄高資西

路已斷而德興阿等嚴扼北路亦斷不慮其疏失惟念揚州西路自樸樹灣直達儀徵六合江岸綿長上下游皆須兼顧德興阿營中惟翁同書以文員幫辦尙無武職幫辦之員設有緩急分兵統帶尙恐乏人見在江南軍營不少帶兵大員何人堪勝幫辦之任和春必能知悉著卽酌保一員一面奏聞一面先行飭赴江北幫同德興阿督辦軍務當此圍攻喫緊之際全在同心協力庶可迅奏膚功和春不得以無員可派一奏塞責務與德興阿通籌合剿無分畛域儻瓜州先克卽可進攻江浦以掣金陵賊勢或鎮江先克而該逆有北竄之謀則南路追襲之兵卽當迅速渡江與北路互相援應總在該大臣等統籌大局計出萬全朕將拭目以待捷音之至也將此由六百里各諭令知之○命慶廉來京以李續賓爲浙江布政使

記名布政使

○予雲南殉難學正盛續芳祭葬世職○

庚午諭軍機大臣等前據英桂奏官軍越山由裕州一帶追剿賊匪疊獲大勝餘匪四散奔逃各路竄伏者尙多並節據曾望顏以匪偏南陽選派將弁兵勇馳赴商南雒南一帶分投防堵本日復據曾望顏奏賊匪二千餘人由盧氏縣一路先撲箭桿嶺復竄近龍駒寨武關等處滋擾各等語賊匪既經竄入陝境若不以兩省兵力四面兜拏恐被剿再奔夔及南山一帶陝省完善之區豈容任其蹂躪曾望顏前經派兵由潼關商州兩路前進茲據奏調陝安鎮兵取道南山進剿又飛催龍澤厚一軍就近追擊兵力已不爲單弱著英桂卽飭帶兵員弁不分畛域越境追剿會合陝省兵勇協力兜拏務須一律殲除毋畱餘孽將此由六百里各諭令知之○予江南陣亡從九品胡光前等祭葬世職○王申諭內閣何桂清等奏刁劣官幕盤踞句串滋鬧糧臺侵吞軍餉遵旨按照軍

法從事一摺江南丹陽分局糧臺有候選從九品王聯甲王先諡及幕友曹金聲於委員散放兵餉時膽敢恣憑游棍從旁滋鬧乘機侵吞餉銀一千三百餘兩之多該督於訊明後即將該三犯處斬梟示所辦甚是刁劣官幕視糧臺爲利藪把持舞弊藐法已極見在江南已將王聯甲等二首悉辦此外各路糧臺如有此等匪類隨營滋擾著統兵大員各督撫卽行照此辦理以儆刁頑其在逃各犯仍著何桂清等查拏務獲按律嚴懲將此通諭知之○諭軍機大臣等福濟等奏賊匪分擾和含見籌布置並首德布因糧盡退守各等語賊匪分股竄擾和含首德布營盤被陷退往赤鎮地方賊勢已極猖獗必當以重兵扼剿惟瓜州尙未克復圍攻正在喫緊和春德興阿斷不能撥兵先往皖北援應儻瓜鎮攻克自當諭令分兵前往見在福濟等已於廬城調派兵勇二千餘名又

加調千餘名並調壽山駐防參將吳秀帶兵勇一千名會合赴援其音德布所帶兵勇本有四千見雖接仗潰散不難招集合計兵力已不爲單弱著福濟鄭魁士督飭前項兵勇趕緊追剿毋令蔓延至皖北江面亦關緊要並著福濟等設法嚴防毋令賊匪再有北竄將此由六百里諭令知之○轉國瑞爲刑部左侍郎調孟保爲刑部右侍郎以靈桂爲理藩院右侍郎由內閣學士遷○准截畱兩淮起解甘餉銀三萬兩備安徽軍需○予安徽軍營病故副都統容照祭葬卹廕○予安徽殉難國子監典籍唐長齡等祭葬世職○癸酉諭內閣曾望顏奏賊匪竄入武關直撲商南縣城見在擊退並追剿情形一摺陝西試用同知張兆蓉候補知縣施作霖督帶勇練在商南防堵探聞賊將下竄當卽督勇迎擊次日馳抵清油河該匪偷由天橋河小路竄入武關該員等馳至頭條嶺截擊有

馬步賊百餘人先來撲營擊退後賊又率眾擁至施作霖首先下山張兆蓉整隊齊進賊遂回關固守施作霖身先士卒偪進關前賊匪三面來撲施作霖手刃數賊力竭遇害張兆蓉亦受矛傷賊遂由清油河直撲商南縣城該縣知縣趙繼芬遊擊常有督率兵勇轟斃騎馬賊目數名始行退走由富水關一帶竄去此股賊匪由河南境奔竄商南又由富水關逃逸雖經商南擊退尚未悉數殲除著英桂會望顏不分畛域前後兜剿並飭龍澤厚一軍合力追捕勿畱餘孽○予陝西陣亡知縣施作霖祭葬世職如知府例並建祠○甲戌諭內閣僧格林沁會同刑部等衙門奏遵旨定擬大員被參各款及案內各犯罪名並端華奏聯順等家產不應請抵各一摺此案已革理藩院尙書步軍統領聯順身任一品大員不知自愛於所屬錢糧有監臨之責竟敢得受換銀餘錢及辦公

錢文至三萬四千餘串之多並有廢弛營務及信任慶陽納賄縱容家人索贓失察屬員侵蝕官項濫保營員各款實屬孤恩昧良聯順著照擬斬監候勒限一年完贓後從重發往新疆所鈔家產不准作抵已革筆帖式蘭森廉保恩錦恩需穆克登額已革員外郎毓量已革主事德清已革司務伊奇立均照擬斬監候勒限一年完贓後從重發往新疆已革郎中椿齡已革主事常順均著照擬杖流限內完贓發往軍臺如逾限不完卽著發往新疆以上各員查封家產一併入官均不准作抵已革筆帖式慶陽著從重發往黑龍江充當苦差遇赦不赦著落該革員家屬勒限追贓亦不准以家產相抵已革書吏章安瀾著照擬斬監候並卽查鈔家產入官亦不准作抵吏部主事恩輝著交都察院照例議處解任中營副將李英著卽革職參將李萬年馬漣遊擊蘇恩綬馬服襄李

炳業都司王全山肇春守備程秀純貴特通阿周光恆張海筆帖式奎斌均著分別交部議處世襲雲騎尉蘇聯芳著交部照例議處筆帖式慶春著交部察議○予安徽軍營病故提督秦定三祭葬卹廕諡恭武○丙子諭軍機大臣等法福禮奏凱撤官兵並請畱帶兵大員及籌辦各情一招官兵自出卡追擊獲勝後匪蹤遠竄邊圉肅清回民復業所有土爾扈特和碩特蒙古及喀喇沙爾綠營兵自應分別凱撤至一切善後事宜業已有旨令法福禮會同裕瑞並面商慶英固慶會同扎拉芬泰酌量辦理並未另派大員著該大臣仍遵前旨悉心覈辦常清卽遵旨來京毋庸暫畱軍營至首逆倭里罕在逃前據慶英固慶奏已飭阿奇木伯克阿克拉依都函致浩罕伯克胡達雅爾令將賊目拏送許以恕罪通商並諭知卡外各愛曼布魯特一體擒拏若能殲厥渠魁自可消弭

後患儻浩罕伯克抗不遵照卽如慶英等所議不准安集延等通商以示懲儆仍無庸深入窮追致有挫失將此諭令知之○丁丑諭內閣雲南各屬漢回讐殺幾徧三迤一載有餘兵連禍結朕以起釁根由總因地方官辦理不得其平是以特授吳振械爲雲貴總督統帶四川官兵前往復命前任山東巡撫張亮基帶兵隨後繼進諭令該督等但分良莠不分漢回秉公查辦以息爭端而綏邊圉本日據吳振械奏行抵曲靖沿途查訪情形此次回民滋事半由漢民倡議滅回以致回民疑畏憤激而成該督入境停兵單車曉諭悔悟者頗多試思漢回皆朕赤子本不應有所偏袒若使啟釁之初地方官卽從公判斷以服人心何至報復相尋重煩兵力今吳振械旣查知回民有負冤之處而漢民中乘機搶掠可誅者亦復不少則從前辦理錯謬已可概見所有散貼告示倡議殺

回之前任侍郎黃琮前任御史竇垕業經降旨革職治罪並將辦理不善之大員交吳振械查明參奏朕大公無我之心雖在愚民亦當共喻著吳振械宣播朕旨曉諭各屬回民果係止圖報復並無叛逆之心准其悔罪輸誠各安生業大兵所至毋許妄戮一人其能解散脅從縛獻兇渠實在出力者不特寬其既往之罪仍准該督等據實保奏給予獎敘其漢民有藉團練爲名肆行殺掠者卽以軍法從事經此次剴切曉諭之後漢回皆知悔禍該督等卽可持平辦理慎選良吏妥爲安撫曲直分明人心自定儻仍敢負隅抗拒則是自外生成甘心叛逆卽著該督等統兵進剿該回民咎由自取並非朕不施寬大之恩也該督卽刊刻謄黃徧行曉諭使各屬漢回人等咸知朕除莠安良之至意○諭前因雲南省漢回讐殺當令在籍侍郎黃琮御史竇垕籌辦團練原爲保衛閭閻

起見該侍郎等自應會同地方官熟籌妥辦乃本日據吳振械奏
黃琮寶坊在省城設立總局鐫刻關防徧貼告示令民間紛紛集
聞其意專主殺回以致回眾懷疑尋釁不已而漢民之奸者又復
散播謠言乘機搶掠蔓延各屬辦理實屬不善等語辦團所以安
民黃琮等以鄉紳擅出告示已屬非是且持論不得其平轉致激
成釁端非徒不能保衛地方並使民遭荼毒辦理實屬錯謬黃琮
寶坊均著革職交吳振械查訊治以應得之罪至剿辦事宜係地
方官專責何得任聽紳士惟所欲爲所有從前辦理不善之地方
各官除恒春已故外其巡撫司道及各府州縣均著吳振械查明
參辦嗣後各處練勇均歸文武官員統帶如有未奉調遣自行派
隊者卽將練頭按軍法從事統帶官嚴行參處毋稍寬縱○諭軍
機大臣等吳振械奏參紳士辦團不善一摺並請頒發諭旨以便

勦撫兼施等語雲南省漢回構釁以致省城日久被困原應懾以
兵威使莠民知所做惕再議撫綏惟見在東南各省軍務未平兵
力斷難厚集餉需亦難於籌措且據吳振械奏回民之紛紛尋釁
實由官紳辦理失宜所致此時匪徒蜂起幾徧三巡儻率行進勦
深恐於事無濟徒損兵威且曲靖及省城一帶回民尙不肯自居
叛逆乘其有一綫可原請旨剴切曉諭冀有轉機所奏不爲無見
本日已明降諭旨曉諭回民如該回民悔悟自新即可從公辦理
並著慎選良吏加意撫綏曲直分明人心自定儻仍負固不服或
面從心違則是自外生成國法斷難寬宥該督惟有統率官兵痛
加勦辦無得姑息養奸爲所輕視將此由六百里諭令知之○是
月蠲緩直隸開州等六十三州縣被水被雹地畝額賦並給賑有
差准河南被旱地方漕米改徵小麥准山東德州等十二州縣歉

收漕麥改徵粟米蠲緩湖南武陵等九州縣並岳州衛水災額賦
緩江蘇買補截畱漕米陝西綏德等二州縣旱災應徵兵糧河南
考城等十二廳州縣被災被擾新舊額賦並給難民一月口糧